

PAGTULON-AN 14 — GIKAN SA YUTANG GISAAD NGADTO
SA DALAN SA GINGHARIAN
(1 Samuel 8-2 Samuel 6)

KATUYOAN: Sa pagpakita sa kadautan kon ang atong kaugalingon ang magmando sa atong kinabuhi.

“Hatagi kami ug hari,” maoy tuaw sa mga katawhan, “usa ka hari nga magmando kanamo sama sa ubang kanasiran.” Ug sa mao nga hangyo ilang gisalikway ang Ginoong Dios nga ilang hari ug nagpili ug tawo aron maoy magmando kanila. Gusto sila ug hari nga ilang makita sa ilang mga mata. Sila nangaluya sa paglakaw sa pagtoo ug sa pagsalig diha sa mga gisaad sa Dios. O, mga Israelitas nga walay pagtoo, wala lamay kahibalo sa kagulangan nga mosunod niining ila nga gihangyo, 1 Samuel 10:19.

Imo bang nahinumduman ang bersikulo mahitungod sa dalan sa kirabuhi ug dalan sa kamatayon? Daghan na kaayo ang mga panig-ingnan nga atong nahibaloan sa gidangatan niadtong nagpili sa maong mga dalan. Karon atong mahibaloan ang kaagi sa duha ka hari; ang usa nagpili sa dalan sa kamatayon; ang usa nagpili sa dalan sa kinabuhi.

Ang mga Israelitas diha na sa YUTANG GISAAD, nga gitawag usab nga Canaan, nga may gidugayon nga 350 ka tuig ug daghan kaayo ang mga panahon diin naulipon sila sa dagku kaayo nga mga sala, pagsupak sa kasugoan, pagsimba sa mga dios-dios. Ang Dios nagtawag ug mga maghuhukom na maoy nagmando ug nanalipud kanila sa mga kaaway apan niining tanan ang nagpili ug hari nga maoy magmando kanila maoy labaw ug labing daku nga sala nga ilang nahimo. 1 Samuel 8:9-18.

Ang mao nga hari nga ilang gipili mao si Saulo. Siya guapo, taas, ug makapahimuot sa mga mata sa mga tawo apan ang Dios wala mahimuot samtang Siya naglantaw sa kasingkasing ni Saulo. Atong tan-awon ang iyang mga lihok nga maoy nagpamatuod kon unsa ang diha sa iyang kasingkasing.

(Atong bantayan nga aduna nay kausaban dinhi sa atong dibuho. Ang DALAN SA SAAD nasumpayan na sa DALAN SA GINGHARIAN.)

1. Si Saulo, sa pagmando niya sulod sa duha ka tuig miadto siya sa pagpakiggubat sa mga kaaway nga mga Felistehanon. 1 Samuel 13:1-14. Ang mga Israelitas mibati ug daku nga kalisang. Si Saulo gusto nga maghimo ug kinaugalingong paghalad aron mangayo ug panabang sa Dios, bisan kon wala diha ang pangulo nga sacerdote. Ang balaod sa Dios nagpahimangno nga ang mga

sacerdote lamang ang makahimo sa pagdumala sa mga paghalad. Ug niadto nga taknaa ang sacerdote miabut apan si Saulo naghimo na sa paghalad ug ania ang iyang gipamulong, "Saulo ikaw naghimo ug binuang..." 1 Samuel 13:13,14. "Apan karon ang imong gingharian dili magapadayon: si Jehovah nangita alang Kaniya ug usa ka tawo nga uyon sa iyang kaugalingong kasingkasing."

2. Iyang gisupak pag-usab ang kasugoan sa Dios human sa gubat batok ni Amalec. Wala niya patya ang tanang kaaway ingon nga maoy gisugo ni Jehovah. 1 Samuel 15:1-28.

Karon ang Dios nagpili ug lain nga tawo, tawo nga sumala gayud sa Iyang kasingkasing. 1 Samuel 16:7, Ang iyang ngalan mao si David. Gidihugan ni profeta Samuel si David ug gidala siya ngadto ni Saulo. Siya nahimo nga magdadala sa hinagiban ni Saulo. Karon atong tan-awon sa unsang paagi ang mga linihokan ni David nagpamatuod kon unsa ang diha sa iyang kasingkasing.

1. Gipatay ni David si Goliat, ang hawod sa tanang kaaway. Basaha ang tibuok sugilanon nga nasulat sa 1 Samuel 17:1-58. Gipamatud-an ni David ang iyang kaugalingon nga siya maisug, maminatud-on, tawo nga may pagtoo nga naghatag sa tanang himaya ngadto sa Dios, mapaubsanon, 1 Samuel 17:37,45,46. Miabut ni Saulo ang kasina ug nakahunahuna nga dili niya ihatag ang trono ngadto kang David.

2. Si Saulo naninguha sa pagpatay kang David, 1 Samuel 18:1-14. Si David mikagiw aron lamang maluwas ang iyang kinabuhi. Siya nagalaaglaag sa daghan kaayo nga mga katuigan apan ang Dios nagauban kaniya ug nagabantay kaniya. Iyang gipili ang dalan sa pagtoo ug kinabuhi. Si Saulo usab nagakaubos ug nagakaubos ang iyang pagkadungganon hangtud nga siya miadto sa espiritista aron mangayo ug tambag. 1 Samuel 28:7-19. Iyang gitug-anan si Saulo sa umaabut niya nga kamatayon. Ug kinahanglan nga moila gayud si Saulo sa iyang sala, "Ania karon, ako nagbuhat ingon sa buang ug nasayup sa hilabihan gayud." 1 Samuel 26:21. Iyang gipili ang dalan nga daw matarung sa iyang mga mata apan napamatud-an nga dalan diay ngadto sa kamatayon.

Humn sa kamatayon ni Saulo, si David maoy nahimo nga hari sa tibuok kayutaan.

Si Saulo maoy panig-ingnan sa daan nga kinaiya sa tawo nga mao kanunay ang naglimbong sa tanan nga nautipon kaniya.

Si David maoy panig-ingnan sa atong bag-o nga espirituhanon

nga kinaiya nga atong mabatonan sa dihang atong gidawat ang Ginoong Jesu-Cristo nga atong bugtong manluluwas. Si Cristo mao ang atong kaalam (1 Corinto 1:30) ug ang Iyang ngalan magtatambag, (Isaias 9:6). Ang Proverbio 12:15 nagpahibalo kanato nga, "Ang dalan sa usa ka buang matarung man sa iyang kaugalingong mga mata apang kadtong manggialamon nagapamati ug tambag." Ingon nga si Saulo naninguha sa pagpatay kang David, ang daan usab nato nga kinaiya naninguha sa pagbuntog sa atong bag-o nga kinaiya. Asa man niining duha ka kinaiya ang imong pagasundon karon? Magapadayon ba ikaw sama sa tawo nga buang o sa tawo bang maalam? Si Cristo naghulat kanimo aron mahimo nimo nga magtatambag. Iyukbo ang imong kinabuhi kang Cristo karon.

SAG-ULOHON: "Ang dalan sa usa ka buang matarung man sa iyang kaugalingong mga mata; apan kadtong manggialamon nagapamati ug tambag." Proverbio 12:15.

1. Nganong ang DALAN SA KINABUHI pagatawgon na ug DALAN SA GINGHARIAN? 1 Samuel 8:5,6.

2-3-4. Unsa ang tolo ka lakang nga nakapaus-os ni Saulo gikan sa pagkahalangdon nga hari?

(1) 1 Samuel 13:13 _____

(2) 1 Samuel 15:23 _____

(3) 1 Samuel 28:7 _____

5-6-7. Unsa man ang tolo ka butang nga diha kang David nga maoy nakapahimo kaniya nga takus sa korona sa pagkahari?

(1) 1 Samuel 16:7 _____

(2) 1 Samuel 17:45 _____

(3) 1 Samuel 18:14 _____

8. Sumala sa Proverbio 12:15 ngano nga makaingon ikaw nga si Saulo sama sa usa ka buang?

9. Unsaon man nato pagkabaton ug kaalam? 1 Corinto 1:30.

10. Isulat sa SINAG-ULO ang Proverbio 12:15.

